

TEZAU LITURGIC

21 IUNIE

**ACATISTUL
SF. REGE-MUCENIC
LUARSAB II
AL GEORGIEI**



TBILISI, 2000



დაუჯდომელი წმიდისა დიდებულისა მოწამისა, კეთილმსახურისა მეფისა ლუარსაბისა

კონდაკი 1

მეფობისა და მარტვილობისა გვირგვინითა შემკულსა,
მხნესა ლუარსაბს, უძლეველითა ღუაწლითა
ბრწყინვალესა, ქებით შეგამკობთ შენდამი
მოლტოლვილნი და ვევედრებით სიწმიდესა შენსა:
შეიწირე უღირსი ესე გალობაი ჩუენი, დიდებულო,
და ნუ მოგვაკლებ შეწვენასა შენსა, არამედ ოხაი
ჩუენტვის შესწირე მხსნელისა მიმართ და ცოდვათა
შენდობაი გვითხოვე სარწმუნოებითა შემსხმელთა
შენთა: გიხაროდენ, კეთილად მძლეო მეფეო და
მოწამეო, მხნეო ლუარსაბ!

იკოსი 1

ეკა, ყოვლად გამოუთქმელსა მას შენსა ტრფიალებასა
ქრისტეის მიმართ, ახოვანო მხედარო ღმრთისაო,
რამეთუ მეფობისა წილ გინებაი, და საყდართა წილ
დევნულებაი და გვირგვინისა წილ გუემაი მიიღე, და
სპარსთა საცთურსა ძლიერად არცხვინე,
რომლისათვისცა აღმასრულებელნი ყოვლად

ბრწყინვალისა ხსენებისა შენისანი სარწმუნოებით და სურვილით გიღალადებთ:

გიხაროდენ, ყოვლადბრწყინვალეო სიქადულო მართლისა სარწმუნოებისაო;

გიხაროდენ, სამკვიდრებელო ჭეშმარიტისა ღუაწლისაო;

გიხაროდენ, გონიერო ანდამატო მოთმინებისაო;

გიხაროდენ, ქუხილო საღმრთოისა ქადაგებისაო;

გიხაროდენ, სარწმუნოებითა მტკიცითა

განმაქიქებელო მძლავრთა უღმრთოებისაო;

გიხაროდენ, ფარო დამცველო კეთილმსახურებისაო;

გიხაროდენ, მახვილო განმკუეთელო

ბოროტმსახურებისაო;

გიხაროდენ, წამებისა ნაყოფისა გამომღებელო რტოო ქრისტეის ვენახისაო;

გიხაროდენ, ყუავილო შუენიერო დავითისა

ბრწყინვალისა მტილისაო;

გიხაროდენ, წინამბრძოლო და მეოხო ქართველთა მხედრობისაო;

გიხაროდენ, წარუტყუევნელო ბჭეო ივერთა ეკლესიისაო;

გიხაროდენ, დიდებაო და ძლიერებაო მამულისა ჩუენისაო;

გიხაროდენ, კეთილად მძლეო მეფეო და მოწამეო, მხნეო ლუარსაბ!

კონდაკი 2

რაჟამს მძვინვარემან და სისხლის მსმელმან შაკ-
აბასმან შემუსრა და ტყუ-ყო მკვიდრნი კახეთისანი და
წარმოემართა ქართლსა ზედა, მაშინ დაუტევე მამული
და საყოფელი შენი, მწყემსო კეთილო, და მსგავსად
მხსნელისა განიზრახე თავისა შენისა და სულისა
დადებაი სახსრად ქრისტეანეთა, რომლისათვისცა
აღვსძრავთ ყოველსა ენასა დიდებად და ქებად
შენდა: ალილუია.

იკოსი 2

არა შეიწყალე შენ ახოვნებაი სიჭაბუკისა შენისაი, არცა
დიდებაი და პატივი მეფობისაი, არამედ უფროისად
მწუხარე იყავ და გელმოდა გულსა შერყუნაი წმიდათა
ხატთა და ჯუართაი, და დარღვევაი წმიდათა
ეკლესიათაი, და მინდობილი ღმერთსა ჭემმარიტსა
და მეუფესა ცათასა, წარსდეგ წინაშე უწყალოისა
აბასისა და ითხოვე მშვიდობაი სამეფოისა შენისაი,
ამისთვისცა აღძრვის აწ გონებაი ჩუენი ღუაწლთა
შენთა ბრწყინვალითა ქებითა:

გიხაროდენ, ძირთაგან იესუსითა აღმომორჩებულო;
გიხაროდენ, მაღლითა სულისა წმიდისაითა
განათლებულო;
გიხაროდენ, უფლისა მიერ განბრძნობილო და

განმტკიცებულო;

გიხაროდენ, სიმხნისა მამაცობისა ძლიერებითა

გამოჩინებულო;

გიხაროდენ, ღმრთისმსახურებითა წამებისაითა

გამობრწყინებულო;

გიხაროდენ, დავით წინაისწარმეტყუელისა შვილად

წოდებულო;

გიხაროდენ, საზეპუროისა ერისა შენისა მწყსად და

მოღუაწედ მოვლინებულო;

გიხაროდენ, სიმხნითა და ახოვნებისა ღუაწლითა

პაპათა შენთა, დიდსა ღუარსაბსა და სვიმეონს

მიმსგავსებულო;

გიხაროდენ, უსასყიდლო მსხუერპლად ღმრთისა

მიმართ შეწირულო;

გიხაროდენ, იწროითა კარითა ზეცისა სასუფეველსა

შინა შესულო;

გიხაროდენ, მწყობრსა შინა მარტვილთაითა

განშუენებულო;

გიხაროდენ, წმიდათა ანგელოზთა შორის

განბრწყინებულო;

გიხაროდენ, ივერიელთა მიერ მარადჟამს

სახსენებელო;

გიხაროდენ, კეთილად მძლეო მეფეო და მოწამეო,

მხნეო ღუარსაბ!

კონდაკი 3

რაჟამს წარსდევ, ნეტარო, წინაშე უღმრთოისა მის
ყაენისა, პირველად სიტყვითა ლიქნისაითა
აღვითქუმიდა დიდსა პატივსა და წყალობასა, და
გაწვევდა რაი დატევებასა ქრისტეს სჯულისასა,
ზაკვით ჰგონებდა ცთუნებად მიქცევად სჯულსა მისსა
ზედა, არამედ ამო იქმნა სიცბილი მისი და ვერ ეწიფა
ნებასა გულისა თვისისასა, რამეთუ კადნიერად
აღიარე ძეი მამისა თანა და დიდებაი მიეც სამებასა
წმიდასა: ალილუია.

იკოსი 3

სიტყუანი ცრუ-მოციქულისანი ვერ შეაშფოთებდეს
გონებასა შენსა, არამედ ნაცულად მიუგებდი: „უკეთუ
ყოველივე ქუეყანაი ჩემდა იყოს, არა თავს ვიდვა
სიტყუათა შენთა მორჩილებაი, არამედ მეუფისა და
ღმრთისა ჩემისა ნათელ მიღებიეს და მისსა მიმართ
დამიძს სასოებაი ჩემი, და თვინიერ მისა, სხუაი
ღმერთი არაი ვიცი“, რომლისათვისცა
მართლმადიდებელისა ეკლესიისა შვილნი
განკვირვებითა ხმა-ვჰყოფთ და ვიტყვით:

გიხაროდენ, სულისა აზნაურებისა დამმარხველო;
გიხაროდენ, ქრისტეს ჯუარისა მგმობართა
დამცემელო;

გიხაროდენ, სასოებითა ღმრთისაითა მტერისა
აღლესულისა მახვილისა დამღეწველო;
გიხაროდენ, პატიოსნებისა და მამაცობისა
დამნერგველო;
გიხაროდენ, მრავალთა მიერ განცდათა შეპყრობილთა
და ზრუნვით გარემოცულთა დამხსნელო;
გიხაროდენ, ღმრთივდაცულისა ერისა შენისა
კეთილად დამმწყსველო;
გიხაროდენ, რისხვისა საღმრთოისა დამაყენებელო;
გიხაროდენ, ამპარტავნებითა აღზევებულთა
დამამხობელო;
გიხაროდენ, გულის-სიტყუათა ბოროტთა
დამთრგუნველო;
გიხაროდენ, ერთგულთათვის პატივისა მიმნიჭებელო;
გიხაროდენ, ორგულთა შემადრწუნებელო და
დამამდაბლებელო;
გიხაროდენ, ნათესავსაცა ამას ქართველთასა
აღმატებულთა სიხარულითა ამამაღლებელო;
გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 4

წინაისწარვე უწყოდი რაი უღმობელობაი მძლავრისა
მის შაჰაბასისაი, უბრძანე სამღდელოთა მოღებაი
ხორცსა და სისხლსა ცხოველსმყოფელსა და

ხელგანპყრობით შეჰვლადე ღმერთსა: „შენდა მოვსწყდები ქრისტე ღმერთო ჩემო, ვითარცა ცხოვარი კლვადი, და აწ ღირს მყავ ზიარებად წმიდათა შენთა საიდუმლოთა“, და ეზიარე რაი შიშითა და კრძალულებითა, მადლობაი შესწირე დამბადებელსა ყოველთასა: ალილუია.

იკოსი 4

ესმაი რაი უღმრთოსა მას სიტყუანი შენნი სიბრძნისანნი, გულისწყრომითა აღივსო ფრიად და ბრძანა ფერხთა და ხელთა შენთა შეკრვაი და დილეგსა შინა შეყენებაი, რაითა მრავალსახითა ტანჯვითა მოგაქციოს, გარნა შენ ეგე, ვითარცა ანდამატი, და შეუძრველ, ვითარცა კლდეი, და უშიშ იყავ, ვითარცა ლომი საყოფელსა თვისსა, რომლისათვის სახსენებელმან შენმან განაბრწყინვა ივერთა ეკლესიაი და ყოველნი შეგვკრიბნა გალობად შენდა:

გიხაროდენ, აგარეანთა საცთურისა ძლევიით მამხილებელო;

გიხაროდენ, მარხვითა ვნებათა სიმწარისა და გემოისა მომამაგებელო;

გიხაროდენ, სიტყუათა შენთა საჭურველითა მტანჯველთა მომწყულელო;

გიხაროდენ, დროებითისა შუენიერებისა არარად

შემრაცხველო;
გიხაროდენ, ყოველთა მართლმორწმუნეთა
ნუგეშინისმცემელო;
გიხაროდენ, ბოროტმადიდებელთა მარცხვენელო;
გიხაროდენ, მძლავრთა მძვინვარებისა სრულიად
წარმწყმედელო;
გიხაროდენ, მართლისა სარწმუნოებისა
ამამაღლებელო;
გიხაროდენ, ვნებათა სიმრავლისა, ვითარცა
ლუარძლისა აღმომფხურელო;
გიხაროდენ, სინანულისა ძლით შეცოდებულთა
ლოცვად აღმძრველო;
გიხაროდენ, უღმრთოთა სწავლებათა საღმრთოითა
კადნიერებითა დამხსნელო;
გიხაროდენ, ხილულისა და უხილავისა მტერისა
ღონისა შემმუსრველო;
გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 5

რაჟამს საპყრობილესა შეგაყენეს, აკურთხევდი
ღმერთსა და ითხოვდი მისგან შეწევნასა, რაითა ღირს-
გყოს მიმთხვევად და მკვიდრ-ყოფად ნათელსა
დაუსრულებელსა ყოველთა თანა წმიდათა, და
უფროისად მობაძავ და საღმრთოდ მოშურნე იყავ

მეფეთა შორის წარჩინებულისა და პირველ-მოწამისა მხნისა არჩილისა, რომლისათვისცა ხსენებაი თქუენი ერთობით იდიდების ეკლესიასა შინა: ალილუია.

იკოსი 5

ბაძვითა პირველ ვნებულთა შენთა მეფეთაითა ბრძოლათაგან მტერთასა ყოვლადვე არა შეირყიენ, არამედ სიმხნითა სულისა შენისაითა და გონებისა შენისა სიბრძნითა სარწმუნოებაი, ვითარცა ჯაჭვი შეიმოსე, და მოციქულთა სწავლისაებრ ქრისტე ღმერთი კადნიერად ჰქადაგე, რომლისათვისცა მოხარულ არს ერი ქართველთაი ხსენებისა შენისათვის და ესრეთ გილაღადებს:

გიხაროდენ, უტყუელისა მის აღთქუმისა დამამტკიცებელო;

გიხაროდენ, ქრისტეს ჯუარისა ამღებელო და სარკინოზთა ძირს დამკვეთელო;

გიხაროდენ, ღმრთისა, მეფისა და მამულის სიყუარულისა დამნერგველო;

გიხაროდენ, სილაღითა აღტაცებულთა სარწმუნოებითა დამაწყნარებელო;

გიხაროდენ, უცხო თესლთა საცთურისა კადნიერად დამამხობელო;

გიხაროდენ, ყოველთა ბრალთა და შეცოდებათა ჩუენთა დამხსნელო;

გიხაროდენ, დახსნილთა კეთილზნობითა
აღმძვრელო;
გიხაროდენ, ჭირთა მძვინვარეთა მსწრაფლ
განმდევენელო;
გიხაროდენ, განწირულთა სიკუდილისაგან
გამომხსნელო;
გიხაროდენ, ეშმაკთა გუნდისა დამცემელო და
სრულიად განმაქარვებელო;
გიხაროდენ, ჰრულითა მცონარებისაითა
შეპყრობილთა განმამხნობელო;
გიხაროდენ, ივერიელთა სულიერისა სიმხნისა
განმამტკიცებელო;
გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 6

იხილეს რაი მძლავრთა მათ შუენიერი და
ბრწყინვალეი პირი შენი, ვითარცა ოქროი
გამოდნობილი ბრძმედსა შინა, განკვირვებულ იყუნეს
ფრიად, რამეთუ გუამი შენი თვითო-ფერითა
სატანჯველითა განკაფეს, და ვერ უძლეს შეძრვად
ურყეველისა მის სიმტკიცისა შენისა, ამისთვისცა ჯერ
არს, რაითა განვიღვიძოთ და გულსმოდგინებითა
შევკრბეთ ყოველნი შეწირვად გალობისა: აღილუია.

იკოსი 6

მარა-დღე გეტყოდეს შენ ცრუ-შჯულისა
მასწავლელნი: „ჰოი მეფეო, შეიწყალე სიჭაბუკეი და
შუენიერებაი შენი და შაჰ-აბასისა ბრძანებასა ნუ ურჩ
ექმნები, რამეთუ მწართა სიკუდილითა
მოგაკუდინოს შენ, არამედ დაუტევე სარწმუნოებაი
შენი და იწამე მუჰამედი“, გარნა შენ უშჯულოთა
ქადებანი არად შერაცხენ, არამედ ყოველი საცთური
მცბიერთაი დააკვეთე და დაჰხსენ, რომლისათვისცა
იხარებს ერი შენი მის შორის აღმოცენებისა
შენისათვის და ესრეთ გილაღადებს:

გიხაროდენ, სასოებისა შენისა ღმრთისა მიმართ
დამდებელო;

გიხაროდენ, მრავალფერთა სატანჯველთა ხრწნილთა
ხორცთა ბუნებითა დამთმენელო;

გიხაროდენ, ჭეშმარიტებითა სიცრუისა
დამარლუეველო;

გიხაროდენ, ურვათა და განსაცდელთა
დამაცხრობელო;

გიხაროდენ, მრავალშეთხზულთა მათ მანქანებათა
მტერისაითა დამხსნელო;

გიხაროდენ, სულთა არა წმიდათა განმდევნელო;

გიხაროდენ, ღმრთის დიდებისა მქადაგებელო და
სიმართლისა გამომაჩინებელო;

გიხაროდენ, სიმხნითა ბუნებისა შენისაითა
უმჯულოთა ამპარტავნების დამამხობელო;
გიხაროდენ, ცოდვილთათვის ღმრთისაგან წყალობისა
გამომთხოველო;
გიხაროდენ, ახოვნებითა მტერთა მძლეველო;
გიხაროდენ, ლაშქართა და სპათა დიდად
მწყალობელო;
გიხაროდენ, შენდა მომართ მოლტოლვილთა გზასა
ზედა მცნებათა უფლისათა დამაყენებელო;
გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 7

ექსორიობაი და პყრობილებაი შვიდ-წელ თავს-იდევ
მოლოდებითა გვირგვინთაითა, და მწარედ
შეიწრებული და დილეგსა შეწყუდეული არა
იგონებდი შენ წარმავალსა ქუეყნიურსა ზრუნვასა,
არამედ განიცდიდი სიმხნესა და ლუაწლსა წმიდათა
მოწამეთასა, გვირგვინსა და მოსაგებელსა მათსა, და
ადიდებდი მეუფესა ყოველთასა: ალილოუია.

იკოსი 7

რაიმე ვსთქუათ დასაბამი სიმხნეთა მათ შენთაი, ანუ
გუარ-კეთილობისა შენისაი, ჰოი მეფეო, წმიდაო და
რჩეულო, რამეთუ არცა პატივითა და არცა გინებითა

განემორე სიყუარულსა ქრისტესსა, არამედ
დევნულებაი ჰგონე შენ სასოებით მსწრაფლ
შეერთებად მისა და მარადის ლოცვითა
შეზღუდვილმან დაითმინე ღუაწლი წამებისაი,
ამისთვისცა ენასა ჩუენსა უძღურად მეტყუელსა მოეც
ძალი ჯეროვნად ქებისაი:

გიხაროდენ, ყოვლადბრწყინვალეო ლამპარო და
მწყემსო ქართველთა ერისაო;

გიხაროდენ, ქადაგო მართლისა სარწმუნოებისაო;

გიხაროდენ, დამადუმებელო ურწმუნობისაო;

გიხაროდენ, მიუდრეკელო ზღუდეო

კეთილმსახურებისაო;

გიხაროდენ, ურწმუნოთა მტერთა მიმართ საძღვევლო
დიდო მხედარო ქრისტე ღმრთისაო;

გიხაროდენ, ტკბილად მზიდველო საღმრთოისა
უღლისაო;

გიხაროდენ, მახვილო მომკუეთელო მუჰმედისა
საცთურისა ღუარძლისაო;

გიხაროდენ, განმადლიერებელო ქრისტეისმოყუარისა
ქართველთა მხედრობისაო;

გიხაროდენ, შვიდ-წილად გამოხურვებულო მსგავსად
ოქროისა წმიდისაო;

გიხაროდენ, მომგებელო ძღვევისა გვირგვინისაო;

გიხაროდენ, ძალაო და დიდებაო მეფეთა სკიპტრისაო;

გიხაროდენ, შუენიერო სამკაულო ივერთა

ეკლესიისაო;

გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 8

მაშინ აღივსო სიბოროტითა ეშმაკისაითა უშჯულოი
იგი შაკ-აბასი და უბრძანა შენი საბლითა მოშთობაი,
ხოლო შენ გეუწყა რაი განსრულებაი ღუაწლთა მათ
შენთაი და განსლვაი საკრველთა მათგან ხორცთაისა,
უფროის განძლიერდი და სთქუ: „მაცადეთ, რაითა
ვილოცო უფლისა მიმართ და შემდგომ აღასრულეთ
ბრძანებული მის უღმრთოისა“, და გაქუნდა რაი ხატი
ყოვლადწმიდისა ღმრთისმშობელისა, ილოცე წინაშე
მისა: აღილუია.

იკოსი 8

რაჟამს ძალლებრ გარე მოგადგეს შენ მტარვალნი და
იღრჭენდეს კბილთა თვისთა, მაშინ აღიხილენ,
წმიდაო, თუალნი ზეცად და ხმა-ყავ: „ნეტარ თუმცა
ღირს მყოს ქრისტემან, რაითამცა არა ერთ-გზისა და
ორ-გზის, არამედ მრავალგზის მივსცე თავი ჩემი
სიკუდილსა“, ვითარმედ გული გითქუმიდა შენ
განსლვად და ყოფად ქრისტეს თანა და მოსწრაფედ
რბიოდი ასპარეზსა მას უხრწნელისა ღუაწლისასა,

რომლისათვისცა ეკლესიად მოვკრებით და
მოგართუმევთ ხმასა საღმრთოისა ქებისასა:

გიხაროდენ, წამებისა შენისა ნათლითა მამულისა
წყუდიადისა განმაცისკრებელო;

გიხაროდენ, სათნოებათა შინა განმამტკიცებელო;

გიხაროდენ, ამბოხისა და ბრძოლისაგან
განმარინებელო;

გიხაროდენ, ვნებათა აღმურისა და ბოროტთა
სნეულებათა განმაქარვებელო;

გიხაროდენ, საკვირველებათა ცისკრითა მოსავთა
შენთა განმანათლებელო;

გიხაროდენ, ქრისტეს სიყუარულისა კაცთა შორის
მქადაგებელო;

გიხაროდენ, მამულისა და სარწმუნოებისათვის
მლოცველთა მწყალობელო;

გიხაროდენ, აღბორგებულთა ღმრთისმოძულეთა
მძლეველო;

გიხაროდენ, სპარსთა აღვირ-აღმსხმელო და მართლ-
უკუნ მქცეველო;

გიხაროდენ, რწმენით, სასოებით და სიყუარულით
აღმსთობილთა მაკურთხეველო;

გიხაროდენ, მრავალთა ჭემმარიტსა სარწმუნოებასა
ზედა მომაქცეველო;

გიხაროდენ, საღმრთოისა სარბიელისა ღუაწლითა
შენითა კეთილად სრულმყოფელო;

გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 9

აღილე რაი სიბრძნით საჭურველი სიმხნისაი, უშიშად
განხვედ შენ სიკუდიდ, და ესრეთ ეტყოდი
მტარვალთა: „არა უწყითა, ვითარცა სულითა
წმიდითა იტყვის წინაისწარმეტყუელი დავით:
ჭეშმარიტად იდიდა ღმერთი ასოთა მიერ წმიდათა
მოწამეთასა“, და აღაპყრენ ლუაწლით შემოსილნი
ხელნი შენნი და მიეც დიდებაი განმაძლიერებელსა
შენსა ღმერთსა: ალილუია.

იკოსი 9

„აჰა, ჟამი შეწყნარებული და დღეი სათნოი უფლისაი,
რამეთუ დაუტევობ საწუთოსა ამას სოფელსა და
წარვალ მეუფისა ჩემისათა, რომლისათვისცა
მსუროდა“ - მადლობითა წარმოთქვი, და შეჰვედრე
სული შენი და სამეფოი უფალსა, მაშინ მოვიდეს
უწყალონი და მოგაშთვეს საბლითა მშვილდთასა, და
ესრეთ სრულ-ყუეს რაი წამებაი შენი, მოსწყდი,
ვითარცა ცხოვარი კლუადი, და ვითარცა განწმედილი
ტარიგი, შეიწირე ზეცისა საკურთხეველსა, და აწ
შეერთებული წმიდათა კრებულსა თანა მეობ-ხარ
შენდა შევედრებულთა და სურვილით მგალობელთა:

გიხაროდენ, ტკივილისა და სიკუდილისა
თავსმდებელო;
გიხაროდენ, ზეცისა იერუსალეიმისთვის ტანჯვათა
დამთმენელო;
გიხაროდენ, ზუარაკო წმიდაო და უბიწოო,
ქრისტეისთვის სისხლისა დამთხვეელო;
გიხაროდენ, ქართველთა მწუხარებისა ცრემლთა
დამშრეტელო;
გიხაროდენ, მოწყულთა უხილავთაგან მოისართა
გამკურვნელო;
გიხაროდენ, მაღლითა საღმრთოითა უმეცართა
განმაბრძნობელო;
გიხაროდენ, ნაყოფითა სიმხნეთა შენთაითა
მორწმუნეთა განმამხნობელო;
გიხაროდენ, უღმრთოებისა წყუდიადისა
განმაბნეველო;
გიხაროდენ, უშჯულოებითა დაბრძობილთა
გულისხმისმყოფელო;
გიხაროდენ, სარწმუნოებითა მტკიცითა უკეთურთა
სულთა შემმუსრველო;
გიხაროდენ, შენდამი მოღვთოვითა ვნებულთა
სულთა შემწყნარებელო;
გიხაროდენ, სიყუარულისაგან შუებათა წუთიერისა
და მსწრაფლ-წარმავალისა მომაქცეველო;

გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 10

რაჟამს დაუტევეს წმიდაი გუამი შენი მტარვალთა,
ესრეთ იხილვებოდა ყოველთაგან, ვითარცა ნათელი
ბრწყინვალეი, და მხილველნი ამისნი სარწმუნოებად
უფლისა ჩუენისა იესუ ქრისტესა მიიქცეოდეს, ხოლო
შემხებელნი ყოვლისა სნეულებისა და
უძლურებისაგან განიკურნებოდეს, და ნიშთა მიერ
საკვირველთა ახოვან-ქმნილნი სულითა
განმტკიცდებოდეს, და ყოვლად ძლიერსა ღმერთსა
ხმა-მაღლად უგალობდეს: ალილუია.

იკოსი 10

ვითარცა ბრძანა მაცხოვრმან ჩუენმან იესუ ქრისტემან
წმიდასა შინა სახარებასა: „მწყემსმან კეთილმან
დადვას სული თვისი ცხოვართა თვისთათვისო“,
ეგრეთვე შენცა არა იქმენ სასყიდელით დადგინებულ,
რაითამცა დაუტევე ცხოვარი შენი და ივლტოდი,
არამედ დადევ თავი შენი ქუეყანისათვის და
მოოხრებისაგან განერა ერი შენი, რამეთუ უკეთუმცა
ხოლო შენ განერე ხელთაგან მათთა, მაშინდა
განრყვნილ იყო და მოოხრებულ სიწმიდენი და

ალაგნი ქართლისანი, რომლისათვისცა ღირს შენდა
თქუმად გიხაროდენი ძლევისანი:

გიხაროდენ, კეთილთა სათნოებათა დამნერგველო;
გიხაროდენ, საღმრთოთა მცნებათა გულსა შენსა
დამბეჭდველო;

გიხაროდენ, სიბრძნითა სულისაითა მძაფრთა
სატანჯველთა ახოვნად დამთმენელო;

გიხაროდენ, სანთელო, გონიერთა განმანათლებელო
და უგუნურთა დამწველო;

გიხაროდენ, ცოდვათა ჩუენთა საკრველთაგან
დამხსნელო;

გიხაროდენ, სულთა განმხრწნელთა დამამხობელო;

გიხაროდენ, ამპარტავანთა დამამდაბლებელო;

გიხაროდენ, გულითა მდაბალთა ამამალლებელო;

გიხაროდენ, გლახაკთა შესავედრებელო და
მწყალობელო;

გიხაროდენ, მშიერთა დამაპურებელო და შიშველთა
შემმოსელო;

გიხაროდენ, პატივისმცემელთა შენთა მსწრაფლ-
შემწეო და შესავედრებელო;

გიხაროდენ, მწუხარებათა ჩუენთა სიხარულითა
შემცვალებელო;

გიხაროდენ, კეთილად მძლეო მეფეო და მოწამეო,
მხნეო ლუარსაბ!

კონდაკი 11

ვითარცა დააცხრვე სპარსთა მიერ გულვებადნი
ჭირთა მძვინვარებანი ერსა შენსა ზედა, ეგრეთვე
შენდამი კეთილმსახურებითა მოლტოლვილნი
შეგვაწყნარენ ღმერთსა სახიერსა, რაითა
გარდამოგვივლინოს ძალი, სიმხნეი, სიბრძნეი და
მძლეველობაი ყოველთა მტერთა და მაჭირვებელთა
ზედა ქრისტეის სისხლითა მოსყიდულთა
ქართველთა, ხსენებისა შენისა მადიდებელთა და
სურვილით მგალობელთა: ალილუია.

იკოსი 11

რომელმან სიჭაბუკესა შინა საშუებელნი და გემონი
სოფლისანი არარად შერაცხენ, ქუესკნელად
შთამხდელნი და ამონი, და სატანჯველთა
მოთმინებითა მრავალ-ლონეი იგი სივერაგეი
მტერისაი დაამხე, აწ საცთურისაგან მტერთასა
მაქებელნი შენნი განგუათავისუფლენ და ყოვლისა
განსაცდელისა და სიბოროტისაგან გვიხსენ ჩუენ,
რაითა მყუდროებასა მიმთხვეულნი, მარადის
გიგალობდეთ, დიდებულო, და დაუცხრომელად
გნატრიდეთ:

გიხაროდენ, სისხლითა შენითა მართლისა
სარწმუნოებისა განმადიდებულო;

გიხაროდენ, ერისა შენისა ღმრთეებრივითა ნათლითა
განმაბრწყინებელო;
გიხაროდენ, საღმრთოითა ღუაწლითა შენითა
უხორცოთა წესთა განმაკვირვებელო;
გიხაროდენ, ყოვლისაგან ვნებისა და ენისაგან
მზაკუვარისა განმარინებელო;
გიხაროდენ, სენტა მრავალფერთა და უძღურებისა
განმდევენელო;
გიხაროდენ, მვედრებელთა მიმართ წყალობით
მიდრეკილო და მოსავთა შენთა განმამხნევებელო;
გიხაროდენ, დაბნელებულისა გონებისა ჩუენისა
განმაცისკრებელო;
გიხაროდენ, ცუარითა მით საღმრთოითა მორწმუნეთა
განმაგრილებელო;
გიხაროდენ, შეგინებულისა გონებისა ჩუენისა
აღმადგინებელო;
გიხაროდენ, წარმავალისა მეფობისა წილ, წარუალისა
ნათლისა მომღებელო;
გიხაროდენ, წმიდათა თანა სასუფეველსა
დამკვიდრებულო და ცხონებისათვის ჩუენისა
მზრუნველო;
გიხაროდენ, რამეთუ ხსენებაი შენი საშუებელად
დაგვიტოვე;
გიხაროდენ, კეთილად მძლეო მეფეო და მოწამეო,
მხნეო ღუარსაბ!

კონდაკი 12

ვითარ იგი განსცვალე შენ გვირგვინი მეფობისაი და პორფირი მეწამული შარავანდედსა ზედა წარუვალისა მეფობისასა, ეგრეთვე მიბაძვითა შენითა მთავართა და მხედართა, უაზნოთა და მდაბიურთა შესწირნეს თავნი თვისნი სიხარულით ქრისტესა ღმერთსა, რომელმანცა მოსცა ესე ვითარი მეფეი და მზრუნველი დედისა თვისისა წილ-ხვდომილსა ერსა ჩუენსა, ესრეთ მგალობელსა: ალილუია.

იკოსი 12

დაღათუ დავიწყებისა მიზეზი არს სიკუდილი, გარნა ვერცა წელთა ცვალებამან და ვერცა ჟამთა ვითარებამან შეუძლო დავიწყებად ღუაწლთა შენთა, სულითა განმხნობილო, არამედ ვმწუხარებთ, რამეთუ აწ სხენან წმიდანი ნაწილნი შენნი მუნ ციხესა შირაზისასა, და ვიხარებთ, რამეთუ საუკუნოი დაიმკვიდრე დიდებაი, და დაუცხრომელად ვევედრებით ღმერთსა, ნაწილნი შენნი მოგუენიქნეს წყლულებათა ჩუენთა საკურნებელად, რაითა ყოველნი რწმენით მოლტოლვილნი თაყუანის-ვსცემდეთ ლარნაკსა შენსა სანატრელსა, და ღირსად შევამკობდეთ ქებით ხსენებასა შენსა:

გიხაროდენ, სიქადულო დიდო ბაგრატოვანთა გუარ-
მოდგამისაო, რომელსა გერწმუნა საყდარი დავითისი
და სკიპტრაი სოლომონისი;

გიხაროდენ, მწყემსო კეთილო და მღვიძარეო,
რომელმან სისხლითა შენითა დაიცევ სამწყსოი შენი;

გიხაროდენ, ზღუდეო შეურყეველო თარგამოსიანთა
მორწმუნეთაო, რომელმან სახლი ქართველთა
მეფობისაი შეამკევ წამებისა სისხლითა;

გიხაროდენ, შუენიერო სიკეთითა და წამებისა
ბრწყინვალეობითა, რამეთუ საყდარი მეფობისა შენისაი
პატიოსან ჰყვენ ვნებითა შენითა;

გიხაროდენ, ქრისტეის წინააღმდგომთა მბრძოლო,
რამეთუ სულელ და ცოფ-ჰყავ მრავალ-ღონეი იგი
ბელიარისაი;

გიხაროდენ, კეთილ-მოქმედებითა განათლებულო,
რამეთუ პატიოსანისა გვირგვინისა წილ დაგედგა
შვიდ-გზის დაუჭნობელი გვირგვინი ზეცისაი;

გიხაროდენ, მნათობო ქუეყანისა და სარწმუნოებისაო,
რომელმან განაცისკროვნე ღამეი სპარსთა
საცთურებისაი;

გიხაროდენ, მოლუაწეო და ახოვანო, რამეთუ
მეფობისა შარავანდედსა შეაერთე შენ გვირგვინი
ძლევისაი;

გიხაროდენ, ყოვლადბრწყინვალეო წინამბრძოლო
ქეშმარიტებისაო, რამეთუ მრჩობლ-გვირგვინითა,

ვითარცა უძლეველი მოწამეი იდიდე, და ვითარცა მხედარი ქრისტეისი;

გიხაროდენ, გვირგვინო ეკლესიისაო, რამეთუ ოქროისა უბრწყინვალეს გამოჩნდი ბრძმედსა შინა წამებისასა;

გიხაროდენ, ცათა შინა და ქუეყანასა ზედა განდიდებულო, რამეთუ ელვარებაი ლუაწლისა შენისაი და მცხინვარებაი სიმხნეთაი ცისკროვან-ჰყოფს გულსა მარტვილთმოყუარეთასა;

გიხაროდენ, დიდებაო მოწამეთაო და ბრწყინვალეზაო მეფეთაო, რამეთუ სიმხნეი შენი ოქროისა უბრწყინვალეს განაბრწყინებს მეფეთა სახელსა და განამხნევებს ქართველთა;

გიხაროდენ, კეთილად მძლეო მეფეო და მოწამეო, მხნეო ლუარსაბ!

კონდაკი 13

ჰოი, კეთილ-შუენიერებითა ცისკროვან-ბრწყინვალეო მეფეო და მოწამეო, მხნეო ლუარსაბ! შემნდობელ მექმენ უღირსსა ამას, და შეიწირე კნინი ესე და უნდოი გალობაი, და ვითარცა გაქუს კადნიერებაი დიდი, მითხოვე ქრისტეის ღმრთისაგან ცოდვათა ლხინებაი და წყალობაი, რაითა განბრძნობილითა გონებითა შეგითხზნათ საცნაური გალობაი და შევსწირნეთ შენდა: ალილუია.